

卷四

書名 審看擬式四卷首一卷
 撰者 清 剛毅 撰, 清 葛士達 撰
 卷 卷四
 內容分類 史-政書 法令-律學
 索書號 大木-法類-獄訟-斷獄-10
 編號 B3841100

彩色首頁1

東洋文化研究所漢籍目錄 編號: B3841100

東洋文化研究所漢籍目錄所藏漢籍善本全文影像資料庫 索書號: 大木-法類-獄訟-斷獄-10

漢籍善本全文影像資料庫文本審看擬式四卷首一卷

版權所有: 東京大學 東洋文化研究所
使用上的注意事項

審看擬式卷一

蠹役詐贓擬軍脫逃自首遇

赦不准留養

該某縣知縣某審看得軍犯池壽在配脫逃自首並請留養一案緣池壽籍隸 卑 縣曾充縣署快役於某年月日因索詐縣民吳謂得贓犯案審依蠹役恐嚇索詐貧民者計贓十兩以上發近邊充軍刺發某省某縣安置於某年月日到配經該縣將該折責發交鄉約張四管束至某年月日池壽因配所貧難復母老無依即乘閒脫逃經該鄉約張四報經某縣訊供詳緝滿未獲擬議詳參某月日池壽逃回家內慮被拏獲從重問旋即自行赴案投首經 卑 縣訊供通詳奉批飭審遵提覆鞫供前情不諱逃後詰無另犯不法及知情容留人家配所鄉亦無賄縱情弊案無遁飾查例載充軍常犯至配脫逃初次枷號一箇月本犯近邊者以次遞加又蠹役詐贓十兩以上者

蠹役詐贓擬軍請留養

錢乙訊無該欠逞兇情事應毋庸議不識姓名之過路拆字人無從查傳請免緝究各甘結附卷人證省釋所有擬議緣由是否允協理合具文詳請憲台查核

審看擬式卷三終

審看擬式卷四

恃婦逞刁屢次翻控

該某府知府某審看得某縣孀婦史傅氏恃婦逞刁屢次翻控一案緣史傅氏籍隸某縣其夫史弱在日曾與呂四夥作生意某年月史弱病故傅氏家道貧難呂四疊經周濟嗣因屢借不休不能應付傅氏即因而懷忿某年月日傅氏以呂四借錢未償等詞赴某縣捏控當經該縣傳集訊悉虛誣因傅氏婦女無知從寬飭令具結完案傅氏心懷不甘於某日捏稱呂四糾眾搶奪執持木棒拒捕未傷等詞控經卑府因情節支離批飭不准適

撫憲巡閱到境該氏復以前情赴行轅呈控蒙發卑府集訊遵提覆鞠所控各情均屬子虛實係恃婦逞刁翻控據供前情不諱詰無起衅別故亦無主唆之人案無遁飾查律載凡誣告充

軍者照所誣地里遠近抵充軍役又例載婦女翻控之案恃係
婦女自行翻控審明實係虛誣罪應軍流以上免其實發駐防
爲奴監禁三年又例載白晝搶奪拒捕未經成傷之首犯發近
邊充軍各等語此案史傅氏因挾呂四借貸不遂之嫌始以呂
四借錢未償等詞控經該縣訊結輒因心懷不甘復以呂四糾
眾搶奪拒捕未傷等情屢次捏詞翻控實屬恃婦逞刁查所控
呂四糾眾搶奪拒捕未傷如果得實呂四罪應擬軍今審屬全
虛自應照律反坐史傅氏除越訴輕罪不議外合依誣告充軍
者照所誣地里遠近抵充軍役照誣告呂四白晝搶奪拒捕未
經成傷之首犯發近邊充軍例反坐擬發近邊充軍係婦女挾
嫌翻控仍照名例免其實發駐防爲奴監禁三年限滿由有獄
管獄官察看情形再行詳請核辦呂四訊無搶奪情事並無不
合應毋庸議無干省釋是否允協理合連犯解候

憲臺審轉





繼母呈送忤逆

該某縣知縣某審看得縣民武乙被繼母武李氏呈送一案緣
 武乙籍隸卑縣父與生母早故向與繼母武李氏同居無嫌武
 李氏撫如己出某年月日武乙在外偷吃洋煙被武李氏查知
 訓斥武乙不服用言頂撞武李氏生氣欲毆武乙走避武李氏
 因武乙不服管教卽至縣呈首發遣當經卑職差拘武乙並傳
 族鄰人等到案訊供通詳奉批飭審遵提覆鞫據供前情不諱
 詰無毆詈不法情事案無遁飾查例載母呈首子懇求發遣者
 卽將所呈之平實發煙瘴地方充軍等語此案武乙因偷吃洋
 煙經其繼母武李氏查知訓斥不服輒敢用言頂撞殊屬不法
 自應按例問擬武乙合依母呈首子懇求發遣者卽將被呈之
 子實發煙瘴地方充軍例擬發煙瘴地方充軍仍照名例以足
 四千里爲限到配後杖一百折責安置無干省釋是否允協理

合連犯解候

憲臺審轉

Blank area with vertical lines, likely a placeholder for a table or detailed case notes.



義父呈送忤逆

該某縣知縣某審看得縣民秦四被義父秦三呈首發遣一案緣秦四籍隸卑縣係秦三之義子秦四本係趙姓之子於某年五歲時父母俱亡秦三因乏子嗣將其抱養過門作為義子改從秦姓至十六歲時秦三為其婚娶妻室恩養二十餘年秦四平素遊蕩不務正業秦三屢訓不悛某年月日秦四將家內米麩偷去變賣花用經秦三查知訓斥秦四不服用言頂撞秦三不依秦四走避秦三因秦四不服管教即至縣呈首發遣當經卑職差拘秦四到案訊供通詳奉批飭審遵提覆鞫據供前情不諱詰無毆詈不法情事案無遁飾查例載義子過房在十五歲以下恩養年久若於義父有犯即同子取問如律又父呈首子懇求發遣者即將被呈之子實發煙瘴地方充軍等語此案秦四因竊家內米麩變賣浪費經秦三查知訓斥不服輒敢用

言頂撞殊屬忤逆查該犯秦四於五歲時經秦三收養過房作爲義子撫養二十餘年實屬恩養年限日久自應按例問擬秦四除擅取米麵變錢花用輕罪不議外合依義子過房在十五歲以下恩養年久若於義父有犯卽同子取問如律父呈首發遣者卽將被呈之子實發煙瘴地方充軍例擬發往煙瘴地方充軍仍以足四千里爲限到配後杖一百折責安置無干省釋是否允協理合連犯解候
憲臺審轉

長隨詐贓斃命

該某府知府某審看得某縣長隨李二因事嚇詐致民人賈充自盡一案緣李二籍隸某縣充當某縣長隨先無過犯與縣民賈充素識往來某年月日賈充家娶婦李二往賀見賈充僭用五品頂服李二素知其並無職銜且愚懦可欺起意詐索卽向嚇稱平民僭用頂服罪名甚重欲回縣首告賈充畏懼許給銀二十兩李二聲稱非二百兩斷難息事賈充再三央懇李二不允並稱明日定須稟縣差拏吵嚷各散賈充因對眾受辱又慮到官治罪忿不欲生經其戚友王三等暨其妻子勸慰莫釋是夜三更乘家人睡歇後投縊殞命次早經屍子賈名兒查知解救無及投約報驗適經該縣訪聞當將李二收禁稟經卑府飭委鄰封某縣馳驗委係自縊身死訊供通詳奉批飭卑府提審遵卽提案覆鞫據各供前情不諱詰無別項起衅情由亦無詐



索別案及幫同嚇詐之人案無遁飾查例載長隨嚇詐得財舞弊者照蠹役詐贓例治罪又蠹役嚇詐斃命不論贓數多寡已未入手若死係有干例議之人係嚇逼致自盡者擬絞監候各等語此案李二因見賈充僭用五品服色輒敢起意嚇詐致令愁急自縊殞命實屬不法自應按例問擬李二合依蠹役嚇詐斃命不論贓數多寡已未入手若死係有干例議之人係嚇逼致自盡者擬絞監候秋後處決仍面刺贓犯二字賈充僭用五品頂服本干例議業已自盡應與勸救不及之王三等均毋庸議頂服追取入官賈充口許空贓並未過付應免著追無干省釋屍棺飭屬領埋所有此案失察長隨詐贓斃命職名係某縣知縣某例應隨案聲請附參是否允協理合連犯解候

憲臺查核審轉

偽造印信

該某縣知縣某審看得獲犯張大獨自起意偽造印信未成一案緣張大籍隸卑縣刻字匠營生先未爲匪某年月日張大因貧難度獨自起意偽造印信冀圖誑騙錢文度用卽在街上拾得破落卑縣張貼告示印花一顆攜回作樣並買黃蠟一塊將印花反粘蠟上用刀依樣雕成某縣印信一顆篆文筆畫尙未齊全卽經卑職訪聞獲犯訊供通詳奉批飭審遵提覆鞫據供前情不諱詰無另犯不法及同夥之人案無遁飾查例載偽造諸衙門印信止圖誑騙財物爲數無多爲首雕刻者杖一百流二千里造而未成減一等又偽造印信之案如篆文筆畫實未齊全又未誑騙得財方以造而未成科斷各等語此案張大因貧難度輒敢起意偽造印信冀圖誑騙錢文實屬不法查該犯所造偽印篆文筆畫驗未齊全又未誑騙財物卽屬造而未成

審育疑式

卷四

偽造印信

六

自應按例減等問擬張大合依偽造諸衙門印信止圖誑騙財物爲數無多爲首雕刻者杖一百流三千里造而未成減一等例擬杖一百徒三年到配折責充徒年滿預詳請釋起獲偽印刻刀案結銷燬所有失察偽造印信業經卑職訪獲究辦應請免議是否允協理合連犯解候
憲臺審轉

詐爲官文書

該某州直隸州知州某審看得卑州家人王升詐爲路票盜用印信尙未施行一案緣王升籍隸江南某縣向在卑州署內服役經卑職派令用印某年月間王升擬回籍省親稟經卑職准予給假王升因往返川資不敷買得絨毡幾十條至家販賣漁利又慮關卡盤查起意詐爲路票冀圖免稅某月日各房將公事繕就送簽經卑職飭令用印王升乘卑職不防卽盜印空白紙一張藏在身邊是夜三更時分王升見人均睡歇卽將身藏盜印空白取出在紙上填寫卑職銜名並稱家人王升前往江南某縣公幹隨帶行李經過各口關卡不得留難字樣次日早正擬動身卽被卑職查知搜出路票訊供通詳奉批飭審遵提覆鞫據供前情不諱詰無誑騙財物亦無知情同謀之人案無遁飾查律載詐爲州縣衙門印信文書杖一百流三千里未施

行者減一等等語此案王升因回籍省親販運絨毡漁利慮恐
關卡盤查輒敢起意詐為路票盜用印信冀圖免稅殊屬不法
雖事未施行即經查獲自應按律減等問擬王升合依詐為州
縣衙門印信文書杖一百流三千里未施行者減一等律擬杖
一百徒三年遞籍定地充徒年滿預詳請釋詐為路票先行塗
銷案結燒燬再此案失察盜用印信於未經施行之前經
自行查出例得免議合併聲明是否允協擬合連犯解候
憲臺審轉

書吏詐為州縣衙門文書誑騙財物

該某縣知縣某審看得已革兵書趙甲等因貧起意詐為差票
圖詐錢文盜用印信尙未施行一案緣趙甲錢乙籍隸某縣向
充卑縣兵房刑房經書先無舞弊不法某年月間趙甲在房間
坐適錢乙趨至說起窮苦難度趙甲起意詐為拉車差票盜用
印信誑錢度用錢乙允從即於某月日趙甲將差票寫成藏在
身邊某日下午卑職喚趙甲進署用印趙甲乘空將詐為差票
取出在於年月上用了印信一顆正欲藏匿即經卑職看破盤

出實情搜獲詐為差票差獲錢乙訊供通詳奉批飭審據供前
情不諱詰無另犯為匪不法及通同舞弊之人究詰不移案無
遁飾查例載詐為州縣衙門文書誑騙財物者發近邊充軍又
律載詐為文書盜用州縣官印信未施行者減一等為從又減
一等又例載各衙門書吏舞弊藉案生事擾民者係知法



審看擬式 卷四
犯法俱照平人加一等治罪各等語此案革書趙甲因貧難度輒敢起意糾邀革書錢乙詐爲拉車差票盜用縣印冀圖譎錢度用殊屬藐法雖該犯等甫將差票造成尙未施行自應按例減等問擬趙甲合依詐爲州縣衙門文書誑騙財物者發近邊充軍例上減一等擬杖一百徒三年該犯係書吏舞弊知法犯法應加一等擬杖一百流二千里到配折責安置錢乙聽從趙甲詐爲差票未行係屬爲從亦應按例減等問擬錢乙合依詐爲州縣衙門文書誑騙財物者發近邊充軍例上減一等杖一百徒三年爲從又減一等杖九十徒二年半係書吏舞弊知法犯法加一等擬杖一百徒三年到配折責拘役年滿預詳請釋起獲詐爲差票案結銷毀所遺兵房刑房經書缺額月行點充詳報無干省釋此案係卑職自行查發所有失察盜用印信職名應請免議是否允協理合連犯解候

憲臺審轉

審看擬式

卷四

書吏詐爲州縣衙門文書誑騙財物

九



私燬制錢

該某縣知縣某審看得獲犯張三銷燬停用鐵制錢一案緣張
 三籍隸^卑縣鐵匠營生先未為匪某年月日張三因從前積有
 停用鐵制錢十千數百文起意銷化漁利即在自已家中安設
 鑪鍋於是月某日夜三更時分獨自開鑪鎔化尙未化完即經
 卑職訪聞並據鄰居王四等投約首報會督營典獲犯訊供通
 詳奉批飭審遵提覆鞫據供前情不諱詰無另犯銷燬制錢及
 同夥知情之人案無遁飾查例載銷燬制錢圖利之犯審實將
 為首者擬以斬決家產入官又銷燬錢文之案如有存留停用
 鐵錢並不赴官售賣輒自銷燬者于私銷制錢為首斬決例上
 酌減一等發邊遠充軍各等語此案張三存留停用鐵制錢並
 不赴官售賣輒敢銷燬漁利殊屬不法自應按例問擬張三合
 依存留鐵錢並不赴官售賣輒自銷燬者于私銷制錢斬決例

審看機云
上酌減一等發邊遠充軍例擬發邊遠充軍到配折責安置仍
照例刺字該犯訊無家產無憑著追起獲鐵劬及餘錢與住房
一併入官變價冊報鑪鍋當時銷燬鄰佑甲長王四等既據首
告應毋庸議此案係卑職訪獲失察職名請免開送是否允協
擬合連犯解候
憲臺審轉

詐稱內使等官

該某廳同知某審看得趙申等假稱出使官員查勘牧地煽惑
人民一案緣趙申錢二孫三李四均籍隸某省某縣游蕩度日
均先未爲匪某年月日趙申在家適錢二孫三李四趨至各道
貧難趙申聲稱伊稔知口外牧地屢次有人爭奪起意詐稱內
閣學士某某前往體察牧地令錢二扮作隨員孫三等扮作家
人希圖誑騙財物得贓分用錢二等貪利允從趙申僱不識姓
名刻字匠刻就某某名戳一顆印成名片數十張裝在護書內
交孫三攜帶並向過路舊貨擔上買得紅頂一顆裝在舊存紅
纓帽上向不識姓名車夫僱得轎車三輛未向告知情由攜帶
行李與錢二等四六一同起身沿途並不擾害地方亦不訛索
驛站某日行至口外某廳城外捏說前情並稱將爭奪牧地一
併入官如每地一畝出錢一百始可無事有不遵者帶案重懲

等語居民人等聞風畏懼紛紛談論卽經卑職訪聞盤出實情飭差拏獲回廳訊供通詳奉批飭審遵提覆鞫據供前情不諱詰無另犯不法及偽造劄文亦無另有同夥之人案無遁飾查律載詐稱內閣官在外體察事務欺詐官府煽惑人民者斬監候知情隨行者減一等各等語此案趙申聞口外爭奪牧地輒敢起意糾邀錢二等詐稱內閣學士某某前往體察牧地煽惑人民希圖騙錢實屬不法雖無偽造劄付自應按律問擬趙申合依詐稱內閣官在外體察事務欺詐官府煽惑人民者斬監候律擬斬監候秋後處決錢二等聽從同行或扮作隨員或扮作家人均屬知情隨行應於趙申斬監候罪上減一等擬杖一百流三千里到配後折責安置名戳名片紅頂案結銷繳是否允協理合連犯解候

憲臺審轉

刁姦

該某縣知縣某審看得縣民張三刁姦李四之妻王氏一案緣張三籍隸卑縣負苦度日與李四昆鄰居住時相往來李四之妻王氏習見不避某年月日早李四出外探親留王氏在家看門上午時張三至李四家閒坐見王氏房門虛掩張三推開房門見周五與王氏在炕行姦周五見張三進房當卽逃跑王氏下炕央勿聲揚張三起意刁姦卽向王氏聲稱如不與伊姦好定欲聲揚王氏無奈應允卽與張三成姦張三亦卽走回李四並不知情某日黃昏張三潛赴李四家內與王氏在炕說笑被李四撞獲盤出前情控經卑職傳集研訊據供前情不諱詰非用強姦污應卽擬結查律載和姦有夫者杖九十刁姦者杖一百又例載軍民相姦者姦夫姦婦各枷號一箇月杖一百各等語此案張三因見李四之妻王氏與周五在炕行姦輒敢起意

與王氏刁姦均屬不法自應按律問擬惟查刁姦之罪重於和姦今和姦之罪例已加重而刁姦並無重擬專條若仍以刁姦之律擬以杖一百似與和姦之罪無所區別自應酌加問擬張三王氏應照軍民相姦者姦夫姦婦各柳號一箇月杖一百例上加一等各擬柳號一箇月五日杖一百張三滿日折責發落王氏係犯姦之婦照例杖決柳贖追取贖銀入官冊報仍給本夫李四領回聽其去留李四並無縱容情事應無庸議周五在逃緝獲另結除將張三等分別管押取保候示外所有審擬緣由理合呈詳
憲臺查核示遵

刁姦


該某縣知縣某審看得縣民王三刁姦許柳氏一案緣王三籍隸卑縣貿易度日與許柳氏之夫許甲素識往來許柳氏習見不避某年月日許柳氏之隣佑花生至許柳氏家借衣適許甲外出花生見許柳氏在家獨處卽向調戲在房行姦房門虛掩維時王三亦至許柳氏家見院內無人卽推門進房窺見嚇捉花生卽起身逃逸許柳氏央告王三不要聲張王三卽聲言如不與伊行姦定欲告知許甲不依許柳氏畏懼允從卽與王三通姦王三正欲走回適許甲回家撞見盤出姦情將王三拏獲花生逃逸無踪送經卑職傳案集訊據供前情不諱詰無行強重情許甲亦無縱容情事案無遁飾查律載刁姦者杖一百此案王三撞見許柳氏與花生行姦輒敢用言挾制與許柳氏刁姦已成自應按律問擬王三應依刁姦者杖一百律姦夫姦婦

各杖一百許柳氏係犯姦之婦應予的決給本夫領回聽其去
留許柳氏與花生通姦許甲並無縱容情事應毋庸議花生獲
日另結無干省釋所有擬議緣由是否允協理合詳請
憲臺核轉

輪姦

該某縣知縣某審看得縣民周六仔商同吳有當輪姦鄭王氏
已成一案緣周六仔吳有當均與鄭王氏同村素識某年且日
周六仔等在地工作鄭王氏因往母家探望路經該處周六仔
見其少艾四顧無人起意輪姦卽向吳有當商允周六仔上前
向鄭王氏拉手求姦鄭王氏不依斥罵周六仔用強將其撒按
倒地鄭王氏喊叫掙札周六仔拉破鄭王氏布褲拔出身帶防
狼小刀嚇逼成姦吳有當亦將鄭王氏姦污適馮良老踵至周
六仔等瞥見逃逸馮良老向鄭王氏詢悉情由送其回家鄭王
氏向伊夫鄭小毛哭訴鄭小毛投保報縣獲犯訊詳覆鞠據供
前情不諱詰無另犯不法及另有同姦撒按之人案無遁飾查
例載輪姦良人婦女已成之案審實照光棍例爲首擬斬立決
爲從同姦者擬絞監候等語此案周六仔商同吳有當輪姦鄭

王氏已成實屬不法查鄭王氏係良人之婦自應按例問擬周
六仔合依輪姦良人婦女已成照光棍爲首擬斬立決例擬斬
立決吳有富依爲從同姦者擬絞監候例擬絞監候秋後處決
均左面刺輪姦二字馮良老訊係趕阻不及應毋庸議無干省
釋是否允協理合連犯解候
憲臺審轉



雜姦

該某縣知縣某審看得民人李景則強姦幼童陳三兒未成一
案緣李景則與年甫十一歲之陳三兒同村素識某年月日陳
三兒至李景則鋪內玩耍李景則見其韶秀起意雜姦誘至住
房將陳三兒抱住陳三兒未解其意掙脫要走李景則將其攔
在炕上用手拉下陳三兒褲子致將褲子撕破陳三兒大聲哭
喊李景則恐人聽見畏懼鬆手尚未成姦經街鄰王三麻子聞
喊趨至查看李景則面赤無言往外逃逸王三麻子向陳三兒
詢明情由將其送回報縣獲犯驗明陳三兒穀道花紋不散實
未姦污訊供通詳究詰不移案無遁飾查例載強姦十二歲以
下幼童未成審有確據者發黑龍江給披甲人爲奴等語此案
李景則因見年甫十一歲之幼孩陳三兒韶秀輒敢用強擄按
欲行雜姦因陳三兒哭喊尚未姦污自應按例問擬李景則合

依強姦十二歲以下幼童未成審有確據者發黑龍江給披甲人爲奴例擬發黑龍江給披甲人爲奴仍照名例改發雲貴兩廣極邊煙瘴充軍毋庸以足四千里爲限右面刺改發二字陳三兒給親領回無干省釋是否允協理合連犯解候
憲臺審轉

冒姦

該某縣知縣某審看得縣民黃四虎冒姦趙方河之妻趙錢氏已成一案緣黃四虎籍隸卑縣務農度日與趙方河同院居住趙方河之妻趙錢氏生有姿色黃四虎屢欲圖姦因無隙可乘未經下手某年月日夜趙方河赴鄰村採親趙錢氏虛掩房門睡臥二更時分黃四虎起意前往冒姦潛入趙錢氏房內燈尙未熄見趙錢氏脫衣躺臥知已睡熟黃四虎悄聲吹滅燈火上炕揭被將趙錢氏摟抱行姦趙錢氏驚醒謂是其夫問說何時回家黃四虎含糊答應趙錢氏聽非其夫口音忙用手推拒黃四虎告稱姓名趙錢氏大聲喊叫並揪住黃四虎髮辮黃四虎掙脫下炕欲逸適趙方河回歸撞見捉獲趙錢氏哭訴情由送縣訊供不諱詰無起衅別故亦無裝點捏飾情事案無遁飾查律載強姦者絞監候又斷罪無正條援引他律比附定擬各等

語此案黃四虎因趙方河之妻趙錢氏生有姿色輒敢乘其夫趙方河探親出外於趙錢氏黑夜睡熟之際冒姦已成徧查律例並無冒姦婦女已成作何治罪專條惟黃四虎久蓄奸心乘人不覺潛行冒姦與用強姦汚者情無二致以應律例擬黃四虎合比依強姦者絞監候律擬絞監候秋後處決無干省釋是否允協理合連犯解候

憲臺審轉

買休賣休

該某縣知縣某審看得縣民賴修等用財買休賣休一案緣賴修籍隸_卑縣賣布營生與艾錢兒同村往來某年月間賴修積有餘資意欲成家屢託鄰婦胡管氏各處媒說未諧適艾錢兒貧苦無度欲將其妻艾苟氏嫁賣圖得財禮度用艾苟氏因乏衣食亦願改嫁胡管氏從中媒介議定財禮錢一百串文某日胡管氏令艾錢兒親書字據交付賴修收執賴修交清財禮接娶艾苟氏過門至某月初十日艾苟氏胞姪苟不依由口外回歸聞知前事控經_卑縣傳集研訊據供前情不諱詰無別故亦無逼勒休棄情事案無遁飾應卽擬結查律載用財買休賣休和娶人妻者本夫本婦及買休人各杖一百婦人離異歸宗財禮入官媒合人減犯人罪一等等語此案艾錢兒因乏衣食輒商允其妻艾苟氏賣與賴修爲妻賴修知情買休均屬不合艾



錢兒艾苟氏賴修均合依用財買休賣休和娶人妻者本夫本婦及買休人各杖一百律各擬杖一百胡管氏因賴修欲娶妻室明知艾錢兒因貧將妻艾苟氏賣休輒敢從中說合賣與賴修爲妻亦屬非是胡管氏合依媒合人滅犯人罪一等應於艾錢兒等杖一百罪上減一等擬杖九十係婦人照例收贖追取贖銀入官冊報艾苟氏改嫁失身與犯姦無異所得杖罪應請酌決與艾錢兒賴修均折責發落照律離異歸宗給予苟不依領回艾錢兒所得財禮錢文照追入官冊報賣契存卷無干省釋除將人犯管押候示外所有審擬緣由是否允協理合詳請憲臺查核

買休賣休

該某縣知縣某審看得縣民張三等買休賣休一案緣張三籍隸卑縣周氏係張三之妻未生子女張三與李四鄰村認識某年月間張三因貧難度起意將周氏價賣得錢度用周氏因張三家貧亦願找主改適張三卽託村人王明留心媒說適某村人李四因未成室願將周氏買娶爲妻出身價大錢二十千文經王明告述前情張三應允李四卽託王明將身價交清令張三寫立字據於某月日將周氏接娶過門詎周氏之母周姜氏聞知往向張三不依控經卑職傳集研訊據供前情不諱詰無別有別故亦無用計逼勒情事應卽擬結查律載用財買休賣休和娶人妻者本夫本婦及買休人各杖一百婦人離異歸宗財禮入官媒合人滅犯人罪一等等語此案張三因貧難度輒將其妻周氏賣與李四爲妻卽屬賣休買休均屬不合自應按



律問擬張三周氏李四均合依用財買休賣休和娶人妻者本夫本婦及買休人各杖一百律各擬杖一百王明因張三欲將其妻周氏賣休託其留心輒敢媒說與李四爲妻亦屬莽是王明合依媒合人減犯人罪一等於張三等杖一百罪上減一等擬杖九十周氏改嫁失身與犯姦無異所得杖罪應請的決與張三李四王明均折責發落周氏照律離異歸宗給與氏母周姜氏領回張三所得身價照追入官冊報約據存卷除將人犯管押候示外所有審擬緣由是否允協擬合呈詳
憲臺查核示遵



賣空買空

該某府某縣知縣某審看得卑縣商民趙甲錢乙賣空買空一案緣趙甲錢乙均籍隸卑縣俱在城內各開某某號錢鋪生理某年月趙甲因逐日市價大有漲落起意售賣空銀得利花用卽於是月某日在市上聲言按照時估願賣空銀二千兩經某號錢乙如數承買立時過帳約定十日爲期無論輸贏屆時清結至二十日銀價增長計趙甲應賠錢一百二十千文趙甲因無錢付給央一月後再行歸償錢乙應允各先記帳而散卽經卑職訪聞差拏一千人證起獲帳簿到案訊供通詳奉批飭審遵提覆鞫據供前情不諱詰止賣空買空這一次並無另有設局詐騙情事互保各鋪亦無知情容隱之事案無遁飾查例載奸民賣空買空賭賽市價漲落其賣空者照用計詐欺局騙人財物律計贓准竊盜論罪止杖一百流三千里買空之犯照爲

從律減一等又律載竊盜贓一百二十兩杖一百流三千里各等語此案趙甲因銀價大有漲落輒敢售賣空銀圖利實屬不法雖未過付現銀但已經登帳即與入手無異計賭賽錢一百二十千文應作銀一百二十兩自應按例問擬趙甲合依姦民賣空者照用計詐欺人財物律計贓准竊盜論一百二十兩杖一百流三千里例擬杖一百流三千里免刺到配折責安置錢乙合依買空之犯照為從減二等例擬杖一百徒三年到配折責充徒年滿預詳請釋趙甲應賠錢文係彼此俱罪之贓照追入官冊報聯名互保各鋪訊無知情容隱應免置議帳簿存卷無干省釋所有此案賣空買空卑職自行訪獲失察職名例得免議是否允協理合詳解

憲臺審轉



賣空買空

該某縣知縣某審看得縣民王長盛與李進財賣買空銀一案緣王長盛李進財均籍隸卑縣俱在錢鋪生理某年三月閒王長盛探知各處現錢缺少意料銀價必落起意售賣空銀得利花用適李進財欲買空銀即於是月十五日按照本日市價王長盛空賣足銀一萬兩李進財全數承買議定對月毋論輸贏屆期結算遂各登帳至四月十五日銀價減落王長盛與李進財算帳李進財應賠制錢一百六十千文李進財無錢央緩王長盛不允正在爭論閒適卑縣巡役踵至問明情由拿獲兩造並調起帳簿送案即經訊悉前情詳奉此審遵提覆鞫據供前情不諱詰止賣空買空這一次尚未得贓並無另有設局詐騙及互保各鋪知情容隱之事案無遁飾查例載姦民賣空買空賭賽市價長落其賣空者照用計詐欺局騙人財物律計贓准

竊盜論罪止杖一百流三千里買空人犯照爲從律減一等等語此案王長盛因各處現錢缺少銀價必落輒敢賣空圖利計應得錢一百六十千文應作銀一百六十兩贓已逾貫實屬不法惟贓未入手係屬虛贓自應酌減問擬王長盛合於姦民賣空者照用計詐欺局騙人財律計贓准竊盜論罪止杖一百流三千里例上酌減一等擬杖一百徒三年李進財商同承買空銀亦應按例問擬李進財合依買空之犯照爲從律減一等等例於王長盛滿徒上減一等擬杖九十徒二年半均到配折責充徒年滿分別預詳請釋李進財應賠錢文既係虛贓應免著追聯名互保各鋪訊係均不知情應免置議帳簿存卷無干省釋此案賣空買空係卑職自行訪獲所有失察職名應免開送是否允協理合連犯解候

憲臺審轉

挾仇放火

該某縣知縣某審看得容民方三因挾仇放火故燒花四場園莠麥稽草等物一案緣方三籍隸某縣務農度日與縣屬金村人花四王二均素識無嫌某年月間方三在地用破鐵鎗頭挖土花四趨視誤劃致傷花四腳跟花四欲控官究治經人勸處令方三出錢五千文養傷息事方三因家貧無錢將衣服當錢付給花四傷旋平復嗣方三因天氣寒冷無錢贖衣實因當與花四養傷錢文所致心懷忿恨因知花四場園內堆積莠麥等物起意乘間放火燒燬洩忿至某月日三更時方三獨自攜帶香火潛至金村外花四場園內四顧無人點燃火紙擲在場內火發逃回經花四路經瞥見喊同村眾趕往將火撲滅查看場內莠麥稽草黍穰均已燒燬因不知何人失火未曾報案方三忿猶未洩知村東崖上有花四堆放柴草空草棚三間起意一



併燒燬卽於是日黃昏時候仍獨自攜帶香火行至金村東崕上因天陰月暗看視不清將王二柴草棚誤認花四草棚卽將香火撩於棚上立卽火發細認始知誤燒忙擁撲救經王二聞知火發趨至方三瞥見畏懼逃逸王二心疑追獲卽同村眾將火撲滅草棚及棚內堆放稽草亦被燒燬花四亦卽趨至向方三盤出實情投保報縣勘訊通詳奉批飭審遵提覆鞫據供前情不諱詰無延燒別姓民房亦無另犯爲匪不法及在場幫燒之人案無遁飾查例載凶徒挾仇放火故燒場園內堆積柴草等物者首犯枷號兩個月杖一百流三千里又名例內載二罪俱發各等從一科斷各等語此案方三因挾花四收其養傷錢文之嫌輒敢起意放火洩忿將花四場內莠麥等物燒燬並誤燒王二草棚實屬凶惡查該犯用破鐵鎗頭劃傷花四平復罪止擬徒其將王二草棚誤燒與燒燬花四場內莠麥等物罪名

相等自應從重從一科斷方三除刃傷人輕罪不議外合依凶徒挾仇放火故燒場園堆積柴草等物者首犯枷號兩個月杖一百流三千里例擬枷號兩個月杖一百流三千里至配折責安置左面刺挾仇放火四字被燒草棚並莠麥等物在於該犯名下照估追賠給主具領花四因被劃致傷經人勸處給錢養傷息事尙無不合其傷已平復應毋庸議所得錢文已爲養傷之費應免著追是否允協擬合連犯解候
憲臺審轉





誤禁平人因而致死

該某府知府某審看得某縣民李四與在逃之張六共毆致傷王良身死並該縣陸令誤禁平人陳震在監病故一案緣李四籍隸該縣務農度日與已死王良村好無嫌王良借欠張六錢三百文屢索未償某年月日早張六向王良索討前欠王良央綏張六不允王良斥其薄情張六辱罵王良回詈張六順拾院放木棒毆傷王良額顛李四路經瞥見上前拉勸王良疑幫牽罵李四順拔身佩小刀扎傷其右手背王良向張六撞頭拚命張六復用木棒連毆傷其左額角喊跌倒地經潘巽攏前勸歇詢悉情由通知王良之子王永和趨至看明扶救詎王良傷重移時殞命張六乘閒逃逸王永和投約報縣驗訊通報嗣據屍子王永和供稱傳聞張六在其姑表兄陳震家內藏匿經該縣陸令票差傳訊因陳震供詞支吾誤將陳震暫時監禁擬次日

再行提訊不意陳震於是日夜陡患霍亂病症未及提禁醫治
卽於次日早病故陸令稟經卑府檄委某縣過境驗訊詳報陳
震委係因病身死並無別故刑禁人等亦無凌虐情弊一面將
案提府審辦並飭據陸令稟覆監禁緣由錄供通詳奉批緝審
查逸犯張六弋獲無期現犯未便久羈遵提復鞫據各供悉前
情不諱詰無起衅別故亦非挾讎故禁應卽擬結查律載共毆
人致死餘人杖一百又刃傷人者杖八十徒二年又官吏因公
事干連平人誤禁致死者杖八十各等語此案李四因張六向
王良索欠爭毆攏勸被罵輒與張六將王良共毆致傷身死查
王良身受各傷該犯用小刀毆扎右手背甚屬輕淺不致戕生
惟被張六用木棒所毆左額角一傷骨損爲重其爲死於此傷
無疑且係最後下手應以張六擬抵李四合依餘人刃傷人者
杖八十徒二年律擬杖八十徒二年定地折責充徒年滿預詳



請釋正凶張六現雖在逃未獲第該犯李四僅止刀扎一傷有
潘巽供證可據無虞避就自應先決從罪毋庸監候待質某縣
知縣陸某因屍親供稱陳震將張六藏匿在家傳訊供詞支吾
誤將陳震監禁病故雖無挾讎故禁情事第陳震係屬平人亦
應按律問擬某縣知縣陸某合依官吏因公事干連平人誤禁
致死者杖八十律擬杖八十係職官聽候

部議屍子王永和因痛父情切供稱張六在陳震家內藏匿得
自傳聞並非有意誣捏旋經查明張六不知逃逸何處陳震並
無藏匿情弊應與勸阻不及之潘巽均毋庸議陳震在監身死
之處業經某縣驗訊暨卑府覆審明確委係因病所致並無別
故刑禁人等亦無凌虐情弊亦毋庸議王良所欠錢文身死勿
征張六飭緝獲日另結各屍棺飭縣傳屬領埋凶器小刀木棒
解驗發回儲庫備照是否允協理合連犯解候

審看擬式卷四終



附審看論略十則

審看之自由來已久應劭漢儀曰每至歲時令通義理明習法律者巡行郡國審定科比覆看事實毋或枉縱是也唐律令格式曰詳看周刑統曰察看其義則同歷代相沿用之審者詳審各犯供詞之同異情偽也看者察看所犯情節之輕重而加以斷語也不曰斷而曰看者由下請上不敢遽定之詞實即獄之判語唐宋以來試士詩賦經義表頌而外加判詞一道

國初鄉會試亦復以之蓋猶古者大學訊囚之遺制而明慎用刑之意即寓乎其中吾

剛公以西曹秋讞之巨手來撫三晉亟亟以此日課羣吏茲復輯刊審看擬式津逮仕途不特深心教育於刑政大有裨益夫亦由古之道非創為是以強人學習也閱者當知此書命意之所在